

GÁLATAS

1 Pablojon, apóstolon. Mach chocbilonic majlel i cha'an winicob mi ti' p'atlelelic winic. Chocbilon majlel i cha'an Jesucristo yic'ot Dios lac Tat tsa' bΛ i teche ch'ojyel Jesús ba'an chameño' bΛ. ²Joñon quic'ot pejtelel hermanojob wΛ' bΛ añob wolic ña'tañet lojon xñopt'añet bΛ la mu' bΛ la' tempa la' bΛ ya' ti Galacia. ³La' aq'uentiquetla i yutslel yic'ot i ñach'talel la' pusic'al ch'oyol bΛ ti Dios lac Tat yic'ot ti lac Yum Jesucristo. ⁴Tsi' yac'Λ i bΛ ti chamel cha'an lac mul che' bajche' yom Dios lac Tat cha'an mi' loc'sañonla ti' p'atlel jontolil am bΛ ti pañimil wale. ⁵La' subjic i ñuclel ti pejtelel ora. Amén.

Ma'anic yambΛ Wen T'an

⁶Woli' toj sajtel c pusic'al come maxto anic ora tsa' la' ñopo, pero wale wolix la' cΛy Dios tsa' bΛ i payayetla ti' yutslel i pusic'al Cristo. Woli la' cha' sutq'uin la' bΛ cha'an mi la' ñop yambΛ t'an. ⁷Ma'anic yambΛ wen t'an. An winicob woli bΛ i tic'lañetla cha'an yomob i soeben i wen t'an Cristo. ⁸La' junyajlel chojqic ti Dios majqui jach mi' sub yambΛ t'an mach bΛ

lajalic bajche' jini wen t'an tsa' bΛ c subu lojon, mi ángel tilem bΛ ti panchan o mi joñon lojon mu' bΛ c sub yambΛ t'an, la' chojqicon lojon. ⁹Che' bajche' tsac subeyet lojon ti yambΛ ora wolic cha' subeñetla. Mi an majch mi' subeñetla yambΛ wen t'an yilal mach bΛ jinic tsa' bΛ lac ñopo, la' chojqic jini winic ti Dios. ¹⁰¿Woli ba c sajcan c ñuclel ti' tojlel winicob, o ti' tojlel Dios? ¿Woli ba c cha'len chuqui uts'at cha'an mi' q'ueloñob ti ñuc winicob? Muq'uc c mel chuqui uts'at cha'an mi' q'ueloñob ti ñuc winicob, mach i winiconic Cristo.

I ye'tel Pablo cha'an jini Wen T'an

¹¹Com c subeñetla hermanojob, mach ch'oyolic ti winicob jini wen t'an tsa' bΛ c subu. ¹²Ma'anic tsi' yaq'ueyoñob winicob. Mach cantesΛbilonic i cha'an winicob. Jesucristo tsi' pasbeyon i sujmllel. ¹³Tsa'ix la' wubi bajche' tsac ñopbeyob i costumbre israelob. Ma'anic i p'isol bajche' tsac tic'la i cha'año' bΛ Dios mu' bΛ i tempañob i bΛ. Tsac ñopo c jisaño. ¹⁴Ti pejtelel i costumbre israelob ñumen bΛxon bajche' c pi'lob. Ñumen bΛxon ti' subol i t'an c ñojte'elob.

¹⁵Dios tsi' yajcayon che' maxto anic tsa quila pañimil. Tsi' paɣayon ti' yutslel i pusic'al ¹⁶che' ba tsi' pasbeyon i Yalobil. Tsi' yac'la ti tsictiyel i Yalobil ti joñon che' bajche' yom i pusic'al cha'an mic sub Cristo ti' tojlel jini mach ba i cañayobic Dios. Che' jini ma'anic tsaj c'ajtibe winicob i sujmllel jini wen t'an. ¹⁷Ma'anic tsa' majliyon ti Jerusalén ba'an jini ñaxan ba apóstolob, pero tsa' majliyon ti Arabia. Tsa' cha' tiliyon ti Damasco.

¹⁸Che' ñumenix uxp'ejl jab, tsa' letsiyon majlel ti Jerusalén cha'an mij can Pedro. Ya' tsa' jaleyon jo'lujump'ejl (15) q'uin yic'ot Pedro. ¹⁹Ma'anic tsaj q'uele yamba apóstol, cojach Jacobo i yijts'in lac Yum. ²⁰Awilan, ti' tojlel Dios mach c lotic jini woli ba c ts'ijbubeñetla. ²¹Ti wi'il tsajniyon ti tejclum tac ya' ti Siria yic'ot ti Cilicia. ²²Ti jim ba ora maxto cambilonic i cha'an año' ba ti Cristo mu' ba i tempañob i ba ya' ti Judea. ²³Tsa' jach i yubiyob chuqui woli' yalob año' ba: Jini tsa' ba i tic'layonla ti yamba ora wolix i sub jini wen t'an tsa' ba i lon ñopo i jisan, che'ob. ²⁴Tsi' q'ueleyob i ñuclel Dios ti joñon.

**Jini xcant'añoob tsi' ch'amayob
ti wenta Pablo**

2 Che' ñumenix ch'anlujump'ejl (14) jab, tsa' cha' letsiyon majlel ti Jerusalén quic'ot Bernabé. Tsac paɣa majlel Tito ja'el. ²Cantesabilon ti Dios tsa' majliyon cha'an mic tsictesabeñob jini wen t'an mu' ba c subeñob gentilob*. Tic bajñel lojon yic'ot jini hermanojob año' ba i ye'tel

tsac subeyob pejtél chuqui tsac cha'le yic'ot pejtél j cantesa, cha'an uts'at mi' yujtel que'tel ti' tojlelob che' junlajal lac pusic'al. ³Uts'at tsi' pejcayoñob yic'ot Tito am ba quic'ot, anquese griego*. Ma'anic tsi' xic'beyob cha'an mi' ch'am tsep* paçhalel, ⁴anquese ya' añoob payxo hermanojob ti mucul tsa' ba ochiyob i yojch'oñon lojon cha'an libre añoonla ti Cristo Jesús. Mi' yalob wersa mi lac ch'an jac' jini mandar cha'an mi laj colt'antel. ⁵Ma'anic tsac wis jac'beyob lojon come com lojon mi' ch'an ajñel i sujmllel jini wen t'an ti la' tojlel. ⁶Jixcu jini wen cambilo' ba año' ba i ye'tel ti' tojlel xñopt'añoob, ma'anic chuqui tsa' cantesantiyon ti' tojlelob. Mi ñucob ti' tojlel winicob ma'anic chuqui mi' cha'len, come junlajalonla ti' wut Dios. ⁷Pero tsi' ña'tayob aq'uebilon tic wenta cha'an mic sub jini wen t'an ti' tojlel gentilob che' bajche' aq'uebil Pedro cha'an mi' sub ti' tojlel israelob. ⁸Che' bajche' lac Yum tsi' wa'choco Pedro cha'an mi' majlel ba'an israelob, tsi' wa'chocoyon ja'el cha'an mic majlel ba'an gentilob. ⁹Jacobo yic'ot Pedro yic'ot Juan, mu' ba i q'uejlelob che' bajche' oy cha'an ñuc i ye'tel, tsi' ña'tayob aq'uebilon i yutslel i pusic'al Dios. Che' jini tsi' yaq'ueyoñob cortesía quic'ot Bernabé ti ñoj ba i c'ab cha'an mic majlel lojon ba'an gentilob. Jini uxtiquil tsa' majliyob ba'an israelob. ¹⁰Tsi' subeyon lojon yom jach mic ña'tan lojon jini p'ump'uño' ba che' bajche' tsac bajñel ña'ta c mel ti pejtelel c pusic'al.

Pablo tsi' tiq'ui Pedro

¹¹Che' ba tsa' c'oti Pedro ti Antioquía, tsac tiq'ui come an i sojqumal. ¹²Come che' maxto c'otemobic i pi'llob Jacobo, temel tsi' c'uxu waj Pedro yic'ot gentilob. Ti wi'il che' ba tsa' tiliyob jini winicob, tsi' tats'la i ba Pedro ba'an gentilob. Ma'anix tsi' chlan pejcayob, come tsi' bac'ña jini mu' ba i cantesañob tsep pachalel. ¹³Yaño' ba jud'ojob ja'el cha'chajp tsi' meleyob i pusic'al lajal bajche' Pedro. Che'ach tsi' mele ja'el Bernabé. ¹⁴Che' ba tsaj q'uele mach tojic woli' yajñelob ti' sujmllel jini wen t'an, tsac sube Pedro che' temel año: Jatet anquese israelet, wola' mel bajche' jini gentilob. Mi ma'anix wola' mel bajche' israelob, ¿chucoch che' jini, ma' lon xic'beñob gentilob cha'an mi' melob lajal bajche' israelob? cho'on tsac sube.

¹⁵Joñonla tsa' ba la quila pañimil ti Israel, mach i pi'lлонicla jini xmulilob, gentilob. ¹⁶Pero la cujil che' mi' ñopob Cristo mi' ñusabentelob i mul. Dios mi' yotsañob ti' wenta cha'an tsi' ñopoyob, mach cha'anic i jac'ol mandar. Mi' yotsañonla ti' wenta ja'el che' mi' lac ñop Cristo. Mi' ñusabeñonla lac mul cha'an tsa' lac ñopo, mach cha'anic i jac'ol mandar.

¹⁷Pero che' woli lac ñop Cristo cha'an mi' yotsañonla ti' wenta, mi lajal mi lac taj lac mul bajche' jini mach ba i cñayobic mandar, ¿jim ba i mul Cristo? Ma'anic. ¹⁸Mi tsa' cha' caji c ñop jini mandar che' ba tsa'ix j caya, tsiquil xñusa

mandaron. Che' jini an c sajtemal, come tsaj cantesayetla mi laj q'uejlel ti toj cha'an ti' ñopol Cristo, mach cha'anic ti' jac'ol jini mandar. ¹⁹Che' ba tsac ñopo j coltan c ba ti' jac'ol mandar, tsi' tsansayon jini mandar yilal. Chameñonix ti' tojlel jini mandar cha'an mic taj j cuxtalel ti Dios. ²⁰Isujm tsa' ch'ijleyon ti cruz yic'ot Cristo. Mach chlan cuxulonix joñon, pero cuxul Cristo tic pusic'al. Wale che' cuxulon tic bac'tal ti pañimil, wolic taj j cuxtalel ti' ñopol i Yalobil Dios tsa' ba i c'uxbiyon, tsa' ba i yac'la i ba ti chamel cha'año. ²¹Ma'anic mic ñusaben i yutsllel i pusic'al Dios. Muq'uic laj q'uejlel ti toj cha'an i jac'ol mandar, lolom jach tsa' chami Cristo.

**Tsa' aq'uentiyob Espiritu
che' ba tsi' ñopoyob**

3 iSojqumetla añet ba la ti Galacia! ¿Majqui tsi' socoyetla cha'an mi la' cly la' jac'ben i sujmllel jini wen t'an tsa' ba wen subentiyetla cha'an tsa' ch'ijle ti cruz Jesucristo? ²Cojach com j c'ajtibeñetla: ¿Tsa' ba aq'uentiyetla jini Espiritu cha'an ti' jac'ol i mandar Moisés? ¿Mach ba cha'anic tsa' la' ñopo jini wen t'an che' ba tsa' la' wubi? ³¿Chucoch sojqum la' pusic'al? Tsa' caji la' ñop Cristo ti' p'atalel jini Espiritu. Wale, ¿mu' ba mejlel la' taj la' wenlel ti la' bajñel wersa? ⁴Tsa' la' ñusa cabal wocol cha'an jini wen t'an. Mach to'olic jach. ⁵Diosach mu' ba i yal'queñetla jini Espiritu. Mi' cha'len ñuc ba i ye'tel ba' añetla. ¿Cha'an ba tsa' la' jac'la jini mandar? ¿Mach ba

cha'anic tsa' la' ñopo che' ba tsa' la' wubi?

⁶Abraham ja'el tsi' ñopo Dios.

Jini cha'an Dios tsi' yotsabe ti' wenta. Tsi' q'uele ti toj. ⁷Ña'tanla che' jini, pejtél mu' ba i ñopob Dios i yalobilobach Abraham. ⁸Wan ts'ijbubíl ti' t'an Dios, mi caj i ñusañob i mul. Mi caj i yotsañob jini gentilob ti' wenta che' mi' ñopob Dios. Jini cha'an tsa' wan subenti Abraham jini wen t'an: "Ti a tojlel mi caj i tajob i wenlel pejtél tejclumob". ⁹Jini cha'an, majqui jach mi' ñop Dios mi' taj i wenlel yic'ot Abraham tsa' ba i ñopo Dios.

¹⁰Come pejtelel mu' ba i ñopob i coltañob i ba ti' jac'ol jini mandar mi caj i chojquelob ti Dios. Come ts'ijbubíl: "Mux i chojquelob ti Dios pejtelel mu' ba i wis clayob i mel ti ts'acal chuqui tac ts'ijbubíl ti' juñilel jini mandar". ¹¹Tsiquíl che' jini, Dios ma'anic mi' ñusaben i mul, ma'anic mi' yotsan ti' wenta mi juntiquilic cha'an ti' jac'ol jini mandar. Come mi' yal: "Jini otsabilix ba ti' wenta Dios cha'an tsi' ñopo Dios, cuxul mi' yajñel", che'en. ¹²Mach lajalic i jac'ol mandar bajche' i ñopol Cristo, come mi' yal: "Jini mu' ba i jac' jini mandar ti ts'acal mi' taj i cuxtalel", che'en. ¹³Pero ya' ti cruz Cristo tsi' mañayonla loq'uel ti' p'atalel jini mandar mu' ba i yac'onla ti chojquel, come tsa' chojqui ti Dios cha'añonla, come ts'ijbubíl: "Chocbil ti Dios majqui jach mi' joc'chocontel ti te'". ¹⁴Che'ach tsa' ujtí cha'an mi' tajob i wenlel gentilob ja'el ti Cristo Jesús, che' bajche' Dios tsi' wan sube Abraham,

cha'an mi lac laj aq'uentel jini Espíritu che' mi lac ñop.

Jini Mandar yic'ot jini Albil ba t'an

¹⁵Mic cha'llen lajiya hermanojob. Wa' ti pañimil che' mi lac ts'ijban ti jun bajche' mi' caj ti t'oxtal lac chubal'an che' mi lac chamel, ma'anic majch mi mejlel i jem. Ma'anic majch mi mejlel i xa' ts'ijban yamba t'an che' anix i sellojlel. ¹⁶Dios tsi' yaq'ue Abraham yic'ot juntiquil i p'olbal jini albil ba t'an. Ma'anic tsi' yala i p'olbalob, pero i p'olbal, come juntiquil jach, jiñach Cristo. ¹⁷Jiñach i sujmllel woli ba c sub: Dios tsi' wan subu cha'an mi caj i tilel Cristo. Che' ñumenix jumbajc' yic'ot lujump'ejl i cha'c'al (430) jab, tsi' yac'la jini mandar. Jini mandar tsa' ba tili ti wi'il ma'anic tsi' jeme jini t'an tsa' ba i ñaxan ala. ¹⁸Mi cha'anach jini mandar mi laj coltantel, che' jini mach cha'anic jini albil ba t'an. Pero Dios ti' yutslel i pusic'al tsi' colta Abraham che' ba tsi' yaq'ue jini albil ba i t'an.

¹⁹¿Chuqui i ye'tel jini mandar che' jini? Dios tsi' yaq'ueyonla jini mandar cha'an mi' tsictesabeñonla lac mul. Pero ma'anix i c'ajñibal jini mandar che' tilemix i P'olbal che' bajche' wan albil. Dios tsi' c'añal i yángelob i yaq'uén mandar Moisés i wenta xñusa t'an. ²⁰Che' an juntiquil jach mach wersajic yom xñusa t'an. Pero Dios, che' ba tsi' lac'la i t'an cha'an mi' coltan winicob x'ixicob, tsi' bajñel wa'choco.

²¹Jixcu jini mandar, ¿i contra ba jini t'an albil ba i cha'an Dios?

Mach i contrajic. Actan tsa'ic aq'uentiyonla laj cuxtalēl cha'an ti' jac'ol jini mandar, che' jini, isujmach mi laj q'uejlel ti toj cha'an ti' jac'ol jini mandar. ²²Pero i t'an Dios mi' yal woli' yajñelob ti' p'atālel mulil pejtelel año' ba ti pañimil cha'an mi la caq'uentel jini albil ba ti Dios che' mi lac ñop Jesucristo, come majqui jach mi' ñop mi' coltāntel.

²³Che' maxto tilemic jini wen t'an mu' ba lac ñop, añoñ to la ti' wenta jini mandar. Ñup'ulonla jinto tsa' tsictesabentiyonla jini wen t'an mu' ba lac ñop. ²⁴Jini mandar tsi' cantesayonla cha'an mi lac ñop Cristo, cha'an mi laj q'uejlel ti toj che' mi lac ñop. ²⁵Wale tilemix jini wen t'an mu' ba lac ñop. Mach chān añoñixla ti' wenta jini mandar. ²⁶I yalobiletla Dios ti la' pejtelel cha'an tsa' la' ñopo Cristo Jesús. ²⁷Ti pejeteletla tsa' ba ochiyetla ti Cristo ti Espíritu, tsa'ix la' xojo Cristo. ²⁸Mi judíojet, mi griegojet, mi añet ti a yum, mi to'ol che' jach añet, mi winiquet, mi x'ixiquet, ma'anic chuqui mi' cha'len, come juntiquilet jach la ti Cristo Jesús. ²⁹Mi i cha'añetla Cristo, mero i p'olbaletla Abraham. Mi caj la' taj chuqui mi la' waq'uentel che' bajche' albil i cha'an Dios.

4 Yom mi la' ña'tan ja'el: Che' alal to jini mu' ba caj i yalq'uentel i chubā'an i tat, lajal jach bajche' x'e'tel, anquese i yumach jini chubā'añal. ²Anto ti' wenta xcāntesajob yic'ot xcāntayajob jinto mi' c'otel i q'uiñilel i jabil tsa' ba i wan ala i tat. ³Che' ja'el joñonla che' alobon to la, mozojonla

yilal. Tsa' lac jac'be i cantesabal lac ñojte'el che' bajche' i tilel mi' ñojpel ti pañimil. ⁴Pero Dios tsi' choco tilel i Yalobil che' ba tsa' c'oti i yorajlel. Tsi' yila pañimil ti x'ixic. Tsa' ochi ti' wenta mandar ⁵cha'an mi' mañonla loq'uel ti' wenta jini mandar, cha'an mi la cochel ti' yalobil. ⁶I yalobiletla. Dios tsi' choco tilel ti lac pusic'al i yEspíritu i Yalobil mu' ba i yal: Papa, c Tat, che'en. ⁷Che' jini mach chān mozojetix la, pero i yalobiletix la. Mi i yalobiletla an chuqui mi caj la' waq'uentel ti Dios yic'ot Cristo.

**Mach yomic mi la' cha'
ñop yamba cantesa**

⁸Ti yamba ora, che' maxto anic tsa' la' ñopo Dios, tsa' la' cha'le to'ol e'tel ti' wenta jini mach ba mero diosic. ⁹Wale mi la' cān Dios, pero ñumen mi' cañetla. ¿Chucoch woli la' cha' mulan i cantesabal lac ñojte'el mach ba anic i p'atālel cha'an mi' coltañetla? ¿La' wom ba la' cha' chujquel ti to'ol e'tel? ¹⁰Mi la' mel q'uin ti' q'uiñilel tac, ti' yuwilel tac, ti' yorajlel tac, ti' jabilel tac. ¹¹Woli la' wac'on ti tsic pusic'al, ame lolomic jach tsac cha'le e'tel ti la' tojlel.

¹²Quermanojob, ti wocol t'an mic subeñetla. Ajñenla ti libre che' bajche'on, come ti yamba ora junlajal lac pusic'al. Ma'anic tsa' la' ts'a'leyon. ¹³La' wujil tsac subeyetla ili wen t'an che' ti ñaxan che' ya' añoñ ba' añetla cha'an ti' caj tsi' tajayon c'amajel. ¹⁴Anquese leco tsa' la' q'uele jini am ba tic bac'tal, ma'anic tsa' la' bi'leyon. Ma'anic tsa' la' ts'a'leyon. Tsa' la' palyayon ochel

che' bajche' juntiquil ángel ch'oyol
 ba ti Dios, che' bajche' Cristo Jesús.

¹⁵ ¿Baqui tsa' majli i tijicñayel la'
 pusic'al? Come mic ña'tan, tsa'ic
 mejli la' loc'san la' wut cha'an
 mi la' waq'ueñon, tsa' la' loc'sa.

¹⁶ ¿Tsa' ba ochiyon ti la' contra
 cha'an tsac subeyetla i sujmler?

¹⁷ Jini yaño' ba bax mi' melob i ba
 cha'an mi la' c'uxbiñob. Pero mach
 uts'atic bajche' mi' melob. Yomob
 i tats'etla loq'uel tic tojlel lojon
 cha'an mi la' c'uxbiñob. ¹⁸ Uts'at mi
 bax mi' melob i ba ti chuqui uts'at
 ti pejtelel ora, mach cojic jach che'
 ya' añon la' wic'ot. ¹⁹ Calobilob, che'
 bajche' x'ixic woli ba ti bajq'uel,
 che'ach wolic cha' ubin wocol
 cha'añetla jinto mi' tsictiyel Cristo
 ti la' pusic'al. ²⁰ Uts'at ya'ic añon la'
 wic'ot cha'an mic wen pejcañetla,
 come cabal woliyon ti tsic pusic'al
 cha'an mach cujilic bajche' añetla.

Lajiya cha'an Sara yic'ot Agar

²¹ Mi la' wom la' wajñel ti' wenta
 jini mandar, ¿mach ba anic mi
 la' ch'amben isujm jini mandar?
 Subeñonla. ²² Come ts'ijbubil
 an cha'tiquil i yalobil Abraham,
 juntiquil i yalobilach criada, yamba
 i yalobilach jini libre ba mach ba
 criadajic. ²³ I yalobil jini criada tsi'
 yila pañimil che' bajche' i tilel mi'
 yilañob pañimil alalob. I yalobil
 jini mero i yijñam ba tsa' tili cha'an
 albil ba i t'an Dios. ²⁴ An i sujmler
 ili lajiya. Jini cha'tiquil x'ixic i
 yejtalach cha'chajp trato. Agar, jini
 criada, i yejtalach jini trato ch'oyol
 ba ti wits i c'aba' Sinaí. Tsi' q'uele
 pañimil i yalobil che' chucul ti to'ol
 e'tel. ²⁵ Jini Agar i yejtalach wits

ya' ti Arabia i c'aba' Sinaí yic'ot
 jini tejclum Jerusalén ba chuculob
 ti to'ol e'tel jini ya' ba chumulob
 mu' ba i ñopob i taj i coltanel
 ti' jac'ol mandar. ²⁶ Pero libre jini
 Jerusalén am ba ti chan. Jiñlach lac
 ña' ti lac pejtelel. ²⁷ Come ts'ijbubil:
 “Tijicñesan a pusic'al, jochol ba
 x'ixic, mach ba anic a walobil. C'am
 yom ma' cha'len t'an, jatet mach ba
 anic a bajq'uel. Come ñumen cabal
 i yalobil jini bajñel ba x'ixic bajche'
 jini am ba i ñoxi'al”. Che'ach
 ts'ijbubil.

²⁸ Joñonla, hermanojob, tsa' la
 quila pañimil che' bajche' Isaac
 cha'an albil ba i t'an Dios. ²⁹ Che'
 bajche' tsa' ujti ti' yorajlel Isaac
 che'ach mi' yujtel wale. Jini mu'
 ba i cha' ilañob pañimil ti Espiritu
 woli' tic'lantelob ti' tojlel jini
 yom ba i yac'ob ti' jac'ol mandar.
³⁰ ¿Chuqui mi' yal i Ts'ijbujel Dios?:
 “Choco loq'uel jini criada yic'ot
 i yalobil, come i yalobil criada
 ma'anic mi' tem ch'am i chuba'an i
 tat yic'ot i yalobil jini mero i yijñam
 ba”. ³¹ Jini cha'an hermanojob,
 mach i yalobilonicla criada. I
 yalobilonla jini libre ba x'ixic.

Librejonixla ti Cristo

5 Librejonla. Cristo tsi'
 yac'ayonla ti colel ba'
 chuculonla. Jini cha'an yom libre
 mi la' chan ajñel. Mach mi la' cha'
 ac' la' ba ti chujquel ti to'ol e'tel.

² Awilan joñon, Pablo, mic
 subeñetla, mi woli la' ch'am tsep
 pachalel, ma'anic i c'ajñibal Cristo
 ti la' tojlel. ³ Mic cha' subeñetla,
 majqui jach mi' ch'am tsep pachalel,
 wersa mi' jac' pejtelel i mandar

Moisés. ⁴Ti pejeteletla mu' ba la' lon ña'tan woli la' ch'ajmel ti' wenta Dios cha'an i jac'ol jini mandar, chobiletixla ti Cristo. Mach cayaletixla ti' yutslal i pusic'al Dios. ⁵Joñonla tsa' ba lac ñopo Dios woli lac pijtan laj colantel ti' p'atlalet jini Espiritu cha'an mi laj q'uejlel ti toj. ⁶Come ti Cristo Jesús ma'anic chuqui mi' cha'len mi tsepbil lac pachalel, o mi mach tsepbilic lac pachalel. Pero jiñach mero ganar che' ñopolix lac cha'an jini wen t'an mu' ba i yaq'ueñonla laj c'uxbin lac ba.

⁷Ti yamba ora tsa' la' jac'la ti uts'at jini wen t'an. ¿Majqui tsi' mactayetla cha'an mi la' c'ay la' ch'ujbin i sujmllel? ⁸Mach tilemic ti Dios mu' ba i p'ayetla. ⁹Jasal ts'ita' levadura cha'an mi' laj xaxan caxlan waj. ¹⁰Cayalon ti lac Yum woli j c'ajtiben cha'an mi' cantañetla ame mi la' jac' yamba t'an. Dios mi caj i yaq'uen i toj i mul majqui jach mi' tic'lañetla. ¹¹Come ma'anic i tic'lantel jini mu' ba i sub tsep pachalel, pero joñon wolic sub jini wen t'an cha'an jini cruz. Jini cha'an wolic tic'lantel. ¹²Uts'at muq'uaic i junyajlel tsepob i ba cha'an mi' loq'uelob ti la' tojlel jini woli ba i tic'lañetla.

¹³Hermanojob, tsa' pajjiiyetla cha'an libre mi la' wajnel. Wale, mach la' jac'ben i tsuculel la' pusic'al che' libre añetla. Ti la' c'uxbiya coltan la' pi'alob. ¹⁴Come uts'at woli la' jac' jini mandar ti pejtelel che' mi la' jac' ili t'an: "C'uxbin a pi'alob che' bajche' ma' c'uxbin a ba", che'en. ¹⁵Pero mi woli la' c'ux la' ba yilal, mi woli la'

jach' la' ba yilal, tsajiletla ame la' jisan la' ba.

I yac'bal jini Espiritu

¹⁶Mic subeñetla: Cha'lenla xambal ti jini Espiritu cha'an ma'anic mi la' jac' i colosojlel la' pusic'al. ¹⁷Come i colosojlel lac pusic'al mi' contrajin jini Espiritu. Jini Espiritu mi' contrajin lac tsucul pusic'al. Jini cha'an mach mejlic la' mel jini la' wom ba la' mel. ¹⁸Mi' woli' toj'esañetla majlel jini Espiritu, mach ch'an añetixla ti' wenta jini mandar.

¹⁹Tsiquil i mul lac tsucul pusic'al. Jini mu' ba i jac'ob mi' tajob i yixic, mi' cha'leñob ts'i'lel, mi' melob chuqui bibi'. ²⁰Mi' ch'ujjutesañob dios tac, mi' cha'leñob wujt, yujilob ts'a'leya yic'ot leto. Tsaytsayña jax i pusic'al cha'an chub'añal. Yujilob mich'ajel yic'ot a'leya. Mi' t'oxob i ba ti leto yic'ot ti yamba i ñopbal. ²¹Tsaytsayña i pusic'al cha'an i wenlel yaño' ba. Mi' cha'leñob jontolil, yic'ot yac'ajel, yic'ot leco ba q'uiñijel yic'ot yan tac ba mach ba wenic. Mic cha' subeñetla che' bajche' tsac subeyetla ti yamba ora, jini mu' ba i cha'len che' bajche' jini, ma'anic mi caj i yochel ti' yumantel Dios.

²²Pero i yac'bal jini Espiritu jiñach laj c'uxbiya, i tijicñayel lac pusic'al, i ñach'talel lac pusic'al, lac p'atlalet ti' cuchol wocol, yic'ot p'untaya, coltaya, i xuc'talel lac pusic'al, ²³la cutslel, yic'ot i tic'ol lac pusic'al. Mach tic'bilic jini mu' ba i mel bajche' iliyi. ²⁴Pejtelel i cha'año' ba Cristo tsa'ix i ch'ijiyob ti cruz i tsucul pusic'al yic'ot

pejtelel i colosojlel yic'ot chuqui mi' mulan. ²⁵Mi cuxulonla cha'an jini Espíritu, la' lac cha'len chuqui yom Dios ti' p'at'alel jini Espíritu. ²⁶La' laj cay lac chañ'esan lac ba. Mach yomic mi lac techbeñob i mich'ajel lac pi'lob. Mach yomic tsaytsayña lac pusic'al cha'an i wenlel lac pi'lob.

6 Hermanojob, mi tsa' yajli ti mulil juntiquil winic, jatetla woli ba la' wajñel ti jini Espíritu, cha' toj'esanla ti' yutsllel la' pusic'al. Q'uele la' ba ame pajyiquetla ti mulil ja'el. ²Coltan la' ba ti' cuchol wocol. Che' jini mi la' jac'ben i mandar Cristo. ³Come mi an majqui mi' lon ña'tan an i bajñel wenlel, woli jach i bajñel lotin i ba. ⁴Ti jujuntiquiletla bajñel caña la' ba. Q'uele mi uts'at a melbal. Tijicñesan a pusic'al mi wen melbil, pero mach ma' chañ'esan a ba ti' tojlel yaño' ba cha'an a melbal. ⁵Come an ti lac wenta lac melbal ti jujuntiquilonla.

⁶Jini woli ba ti cantesantel ti' t'an Dios, la' i coltan i yaj cantesa yic'ot i chub'a'an. ⁷Mach mi la' wac' la' ba ti lotintel. Mach mejlic ti wajlentel Dios. Pejtelel chuqui jach mi' pac' winic mi caj i c'aj. ⁸Jini mu' ba i pac' chuqui tilem ba ti' tsucul pusic'al, mi caj i c'aj toj mulil. Pero jini mu' ba i cha'len pac' ti jini Espíritu, mi caj i c'aj i cuxtalel mach ba anic mi' jilel. ⁹Mach yomic mi lac lujban ti' melol chuqui uts'at, come tal i yorajlel mi caj lac cha'len c'ajbal mi ma'anic mi' lujban lac

pusic'al. ¹⁰Jini cha'an la' laj coltan pejtelel winicob che' i yorajlel to. Pero ñumen yom mi laj coltan jini mu' ba i ñopob Cristo.

Pablo mi' sub i ñuclel i cruz Cristo

¹¹Q'uelela tsac ts'ibubeyetla ili jun ti colem ba letra tac tij c'ab. ¹²Pejtelel yomo' ba q'uejlel ti ñuc mi' wersa xic'beñetla cha'an mi la' ch'am tsep pachalel, come mach yomobic i yubin wocol cha'an i cruz Cristo. ¹³Pero jini woli ba i ch'amob tsep pachalel mach ts'acallic woli' jac'ob jini mandar. Yomob jach mi la' ch'am tsep pachalel cha'an mi' q'uelob i ba ti ñuc cha'an i sellojlel ti' la' bac'tal. ¹⁴Pero ma'anic mic saclan c ñuclel ti la' tojlel, cojach mi cac' ti ñuc i cruz lac Yum Jesucristo, come ya' ti cruz tsa' jili i p'at'alel pañimil tic tojlel. Tsa' ch'ijleyon ti cruz cha'an ma'anic mic ch'an mulan i cha'an ba pañimil. ¹⁵Come ti Cristo Jesús ma'anic chuqui mi' cha'len mi tsepbil lac pachalel o mi mach tsepbilic lac pachalel. Pero mi cha' melbilonla ti tsijib jiñach yom ba. ¹⁶La' aq'uenticob i ñach'talel yic'ot i p'untantel ti Dios pejtelel mu' ba i melob che' bajche' wolic subeñetla yic'ot pejtel jini mero i cha'año' ba Dios.

¹⁷Mach i ch'an tic'lañon majqui jach an tij contra, come tsiquil i yejtal tac c lojwel cha'an i winicon Jesús. ¹⁸Hermanojob, la' ajnic ti la' pusic'al i yutsllel lac Yum Jesucristo. Amén.